

Goh Chok Tong terima anugerah tertinggi NUS



Foto fail

ATAS pencapaian cemerlangnya kepada pembangunan negara, pertumbuhan Universiti Nasional Singapura (NUS) dan usahanya menggalak serta menyokong pendidikan dan kajian dalam bidang sains sosial, Menteri Kanan Emeritus Goh Chok Tong (*gambar kiri*) telah dianugerahkan dengan penghargaan tertinggi NUS.

Anugerah Alumni Unggul Sastera dan Sains Sosial (Sepanjang Hayat) telah disampaikan kepada Encik Goh oleh Pengerusi NUS, Encik Hsieh Fu Hua, ujar kenyataan NUS semalam.

Ia telah diberikan semasa Anugerah FASS STARS 2018 (Khidmat Fakulti Sastera dan Sains Sosial, Pengajaran, Alumni, Kajian, Khidmat Lama), di Hotel One Farrer semalam.

Selain Encik Goh, enam penerima lain turut menerima Anugerah Alumni Unggul Sastera dan Sains Sosial.

Ini termasuk Felo Kanan, Jabatan Ekonomi NUS dan Sekolah Dasar Awam Lee Kuan Yew, Dr Lee Soo Ann; bekas pengerusi Alumni Chapter NUS di Vancouver, British Columbia, Encik Arthur Yap Hock Seng; penyair terkemu-

ka antarabangsa, Dr Lee Tzu Pheng; pengerusi dan Ketua Pengarah bebas Indofood Agri Resources Ltd, Encik Edward Lee Kwong Foo; dan Ketua Pegawai Eksekutif Strategic Moves, Encik Viswa Sadasivan.

Para penerima cemerlang ini telah meraih kecemerlangan dalam bidang masing-masing sama ada di peringkat setempat atau antarabangsa dan hasil kerja mereka juga telah menyumbang kepada kebaikan dan mempromosi sastera dan sains sosial.

Kata Dekan Fakulti Sastera dan Sains Sosial NUS, Profesor Robbie Goh, beliau amat bangga dengan pencapaian cemerlang yang diraih kesemua penerima kali ini.

“Kami juga amat berbesar hati dapat menyampaikan anugerah terunggul kepada Encik Goh bagi khidmatnya yang menjadi contoh kepada Singapura dan masyarakat se-jagat.

“Kepimpinan, dedikasi dan pencapaian penerima anugerah tahun ini akan memberi inspirasi kepada fakulti dan masyarakat pelajar untuk meraih pencapaian lebih tinggi, melakukan penglibatan sosial dan transformasi,” ujarnya.